

25 NOIEMBRIE

SLUJBA

**SF.PREOT-MUCENIC
ALEXANDRU VERSINSKI**

DE LA KUNGANOVO

SF.MUCENICI

PAVEL KUZOVKOV

SI NICOLAE KOPNINSKI

DE LA IVANTEEV

MINEIUL-RU

Служба
Святых новомучеников
Ивантеевских:
священномученика Александра,
мучеников Павла и Николая

На велицей вечерни

На Господи, воззвах: **стихиры на 8, глас 5.**

Подобен: Радуйся Живоносный Кресте:

Радуйтесь, тричисленнии мученицы, / Троицы
Святых непобедимии поборницы, /
священномучениче Александре, / со дружиною
своею Павлом и Николаем доброхвальными; /
вы бо мучителей ярости не устрашились есте / и
ко Христу Владыце исповеданием и страданьми
востекли есте. / Егоже молите, спаситися душам
нашим.

Радуйся, богомудре отче Александре, /
пастырю добрый и наставниче изряднейший, /
града нашего похвало и Отечества нашего

украшение,/ Церкви Российской светильниче
преславный;/ ты бо в Тверских пределах добре
потрудился еси/ и землю Московскую подвигом
твоим освятил еси./ За ны Христу
Пастыреначальнику молися, молим тя,/ спастися
душам нашим.

Радуйтесь, мученицы Павле и Николае,/ храма
Богородицы, вернии хранителие./ Вы бо, от
лжебратий клевету и поношения приемше,/
мучителей безбожных коварства не убоястесь/ и,
Христа Бога дерзновенно исповедавше,/
мученическими венцы от Него увенчаестесь./ О
нас Того непрестанно молитесь // спастися душам
нашим.

Радуйся церковь Русская/ и земле Московская
ликуй,/ совершающе днесь святое торжество:/
память святых Ивантеевских мученик,/ иже,
любовию Христовою распалаеми,/ веры
наставницы и терпения учителя явишася/ и,
даже до крови пострадавше,/ Царствие Небесное
унаследоваша./ Тех молитвами, Христе Боже,/
спаси души наша.

Слава, глас 8:

Тричисленнии мученицы богоблаженнии,/ славы Царствия Христова наследницы,/ священномучениче отче Александре/ и мужественнии Павле и Николае,/ от лжебратий страдания претерпевающе,/ в себе помышляли есте,/ яко Господа ради умерщвляеми есмы/ и несть наша брань противу плоти и крови,/ но к миродержителю тьмы века сего./ Ныне же, Святей Троице предстояще,/ молитесь даровати нам мир и велию милость.

И ныне, Богородичен, глас 8: Царь Небесный:

Вход. Прокимен дне. Чтения три.

Пророчества Исаиина чтение (глава 43):

Тако глаголет Господь: вси языцы собращася вкупе, и соберутся князи от них. Кто возвестит сия в них; или яже от начала, кто слышана сотворит вам; да приведут свидетели своя, и оправдятся, и да услышат, и да рекут истину. Будите ми свидетели, и Аз Свидетель, глаголет Господь Бог, и Отрок, Егоже избрах, да познаете и веруете Ми, и разумеете, яко Аз есмь: прежде Мене не бысть ин бог, и по Мене не будет. Аз есмь Бог, и несть разве Мене спасаей. Аз

возвестих, и спасох, уничижих, и не бе в вас чуждий. Вы Мне свидетели, и Аз Господь Бог, и еще от начала Аз есмь: и несть от рук Моих избавляяй, сотворю, и кто отвратит то; сице глаголет Господь Бог, избавляяй вас Святый Израилев.

Премудрости Соломоновы чтение (глава 3):

Праведных души в руке Божией, и не прикоснется их мука. Непщевани быша во очесех безумных умрети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим аще и муку приимут, упование их безсмертия исполнено. И в мале наказани бывше, великими благодетельствовани будут, яко Бог искуси я, и обрете их достойны Себе. Яко злато в горниле искуси их, и яко всеплодие жертвенное прият я. И во время посещения их возсияют: и яко искры по стеблию потекут. Судят языком, и обладают людьми, и воцарится Господь в них во веки. Надеющиися Нань разумеют истину, и вернии в любви пребудут Ему: яко благодать и милость в преподобных Его и посещение во избранных Его.

Премудрости Соломоновы чтение (глава 5 и 6):

Праведницы во веки живут, и в Господе мзда их, и попечение их у Вышняго. Сего ради примут Царствие благолепия, и венец доброты от руки Господни, зане десницею покрывает я, и мышцею защитит их. Приимет всеоружие рвение свое, и вооружит тварь в месть врагом. Облечется в броня правды, и возложит шлем, суд нелицемерен. Приимет щит непобедимый преподобие, поострит же напрасный гнев во оружие: споборет же с ним мир на безумных. Пойдут праволучныя стрелы молниины, и яко благокругла лука облаков, на намерение полетят. И от каменометных ярости исполнь падут грады, вознегодует на них вода морская, реки же потопят я нагло. Сопротив станет им дух силы и яко вихор развеет их, и опустошит всю землю беззаконие и злодейство превратит престолы сильных. Слышите убо, царие, и разумеите, навикните, судии, концев земли. Внушите держащии множества, и гордящиися о народах языков, яко дана есть от Господа держава вам и сила от Вышняго.

Стихиры на литии, глас 4:

Яко столпи непоколебимии / и яко воини
необоримии Царя Небеснаго, / просияли есте,

страдальцы доброхвальнии./ Вы бо, мужески за веру Христову подвизавшеся,/ безбожных мучителей лютыя ярости не устрашитеся/ и кровьми вашими и терпением ко Христу востекосте./ За ны непрестанно молитеся/ утвердити нас в вере и любви и спасти души наша.

Яко светильницы многосветлии,/ от Христа Света истиннаго верою возженнии,/ мрак безбожия отгоняете/ и от демонскаго омрачения избавляете./ Темже, всеславное ваше совершающе торжество,/ молим вас усердно,/ Христу за ны непрестанно молитеся/ утвердити нас в вере и любви и спасти души наша.

Слава, и ныне, Богородичен, глас тойже:

Призри на мolenия Твоих раб, Всенепорочная,/ и всякия скорби избави землю Русскую,/ дом Твой нареченную/ и кровьми новомученик освященную,/ да не постыдимся, Владычице Державная,/ Тя призывающии,/ Ты бо еси православных Помощь,/ Радость и Покров и Спасение душ наших.

На стиховне стихиры, глас 2:

Безумия безбожных обличителие / и веры
Православныя хранителие, / богомудрии
мученицы Ивантеевстии, / твердым терпением
вашим Царствия Небеснаго достигли есте, /
темже о нас всецедраго Бога молителю,
низпослати нам мир и велию милость.

Стих: Воззваша праведнии, / и Господь
услыша их.

Благочестия наставницы, / мученицы
Христовы доброхвальнии, / кровию вашею
землю нашу освятивше, / венцы нетленными
увенчались есте, / темже о нас Христа
Жизнодавца молителю, / низпослати нам мир и
велию милость.

Стих: Честна пред Господем / смерть
преподобных Его.

Оружницы Христови необоримии, / верою и
терпением вооружившеся, / на врага спасения
добре подвизастеся / и, силою Божию того
победивше, / верныя во истине утвердисте, /
темже о нас Христа Жизнодавца молителю,
низпослати нам мир и велию милость.

Слава, глас 4:

Терпению первых мученик подражающе,/ новии мученицы церкви Русския явистесе,/ богомудре отче Александре,/ Павле и Николае достохвальнии./ Вы бо, нечестивых хульная уста заградивше,/ Христа Бога исповедасте,/ темже горькия муки и смерть приемше,/ в радость Господа своего внидоште,/ Того молитесь спастися душам нашим.

И ныне, Богородичен, глас тойже: Призри на моления Твоих раб, Всенепорочная:

На благословении хлебов тропарь
новомучеников дважды
и Богородице Дево: единожды.

Тропарь, глас 4:

Православия поборницы,/ яко единии от древних, страдальцы новии,/ священномучениче Александре достохвальне,/ с Павлом и Николаем, мучениками славными,/ Истиннаго Бога вернии служителие/ и храма Божия Матере усерднии хранителие,/ за ны Христа Владыку молитесь,/ в вере и благочестии землю нашу утвердити,/ и низпослати нам велию милость.

На утрени

На Бог Господь: тропарь новомучеников, дважды. Слава, и ныне, Богородичен, глас 4: **Е**же от века утаенное:

По 1-м стихословии седален, глас 4:

Яко светильницы пресветлии, / на свещнице церковнем поставленнии и огнем любви Христовой возженнии, / просияли есте, святии мученицы Ивантеевстии. / Темже молим, во тьме греховней пребывающих, блистаньи вашими просветите.

Слава, и ныне, Богородичен:

Скорый Твой покров и помощь, и милость яви рабом Твоим, Чистая, / и прилоги бесовския укроти / и души наша ко славословию возстави, Богородице, / вемы бо, Дево, яко можеша спасти нас.

По 2-м стихословии седален, глас 4:

Мужественнейшим помыслом прешедше мучения, чуднии страстотерпцы, / сквозе огонь и воду проидосте / и ко спасения широте преминусте, / наследие приемше Небесное

Царство./ В немже творите о нас божественныя мольбы, мудрии новомученицы.

Слава, и ныне, Богородичен:

Иже благодарно воспевающийи от сердца/ и просящийи прилежно Твоя милости, Богородице Владычице,/ раби Твои зовут и глаголют:/ Пресвятая Дево,/ предвари и избави от враг видимых и невидимых и всякаго прещения,/ Ты бо еси наше заступление.

Величание:

Величаем вас,/ святии новомученицы Александре, Павле и Николае,/ и чтим честная страдания ваша,/ яже за Христа/ претерпели есте.

Псалом избранный:

Бог нам Прибежище и Сила, Помощник в скорбех, обретших ны зело.

Господи, воздвигни силу Твою и прииди, во еже спасти ны.

Глаголах о свидениях Твоих пред цари и не стыдяхся.

Вси языцы обыдоша мя, и именем Господним противляхся им.

Тебе ради умершвляеми есмы весь день, вменихомся, яко овцы заколения.

Крепость моя и пение мое Господь, и бысть мне во спасение.

По полиелеи седален, глас 1:

Доблий страдальче и служителю Таин Божиих, священномучениче Александре,/ и страсотерпцы Павле и Николае,/ Церкви Русския похвало и утверждение,/ ныне, празднующе вашу память,/ Богу, прославльшему вас, благодарственно вопием:/ слава Давшему вам крепость во страданиих,/ слава Венчавшему вас,/ слава спасающему нас вашими молитвами.

Слава, и ныне, Богородичен:

Стена непобедимая нам, христианом, еси, Богородице Дево,/ к Тебе бо прибегающе, невредами пребываем,/ и паки согрешающе, имамы Тя Молитвенницу./ Тем, благодаряще, вопием Ти:/ радуйся Благодатная, Господь с Тобою.

Степенна, 1-й антифон 4-го гласа.

Прокимен, глас 4: Святим, иже суть на земли Его,/ удиви Господь вся хотения Своя в них.

Стих: Предзрех Господа предо мною выну,/ яко одесную мене есть, да не подвижуся.

Евангелие от Матфея, зачало 36.

По 50-м псалме стихира, глас 6:

Благословенно воинство Царя Небеснаго,/ новии мученицы земли Российския,/ терпением твердым мучителей посрамившии/ и люди православныя в вере и благочестии утвердившии,/ града нашего и Московския земли предстатели теплии,/ за ны Христа непрестанно молителю/ низпослати мирови мир/ и душам нашим велию милость.

Канон Богородице со ирмосом на 6 и новомучеников на 8, глас 4.

Песнь 1

Ирмос: Моря чермную пучину/ невлажными стопами/ древний пешешествовав Израиль,/ крестообразныма Моисеовыма рукама/ амаликову силу в пустыни победил есть.

Еже воспевати вас достойно, святии новомученицы, недоумет ум наш,/ яко красная мира сего презревше и муки не убоявшеся,/ к Свету Невечернему в радость Царствия Христова востекли есте.

Исповедничества образ и веры правило явили есте,/ новомученицы Христовы Александре, Павле и Николае./ Темже, бури богоборческия не устрашившеся,/ терпением вашим миродержца тьмы посрамили есте.

О, велия ваша крепости и страдания, страсотерпцы Христовы всехвальнии!/ Безбожнаго бо гонения, яко новыя лести фараонитския, не убоявшеся,/ пучину греха погибельную, яко море Чермное, немокренно прешли есте.

Богородичен: Дивное чудо и боголепное ныне нам является,/ яко храм Твой, Владычице, по многолетнем заустении обновляется/ и люди под кров Твой паки притекают,/ ихже покрый и заступи честным Твоим омофором.

Песнь 3

Ирмос: *Веселится о Тебе Церковь Твоя, Христе, зовущи:/ Ты моя крепость, Господи,/ и прибежище, и утверждение.*

Терпением вашим, святии новомученицы, страдания и муки мужественне превозмогосте,/ словесы же истинными уста хулителей заградивше,/ верою и упованием ко Христу стопы ваша утвердисте.

Естеством немощни суще,/ духом же, яко безплотнии, пребывше, славнии страдальцы Христовы,/ силою свыше, яко броней и забралом, облеклися есте.

Тьма безбожия за грехи наша покры землю Русскую/ и кровь праведных обагри лице ея,/ но молитвами и страданьми, Господи, новых мученик Твоих,/ Церковь Твою утвердил еси.

Богородичен: **В**оистину Богородицу Тя почитаем, Пресвятая Дево, Одигитрие./ Не презри нас,/ в скорбех, немощех и нуждах в храм Твой притекающих.

Седален, глас 4:

Древним мучеником поревновавше и богоборцев ярость посрамивше, новомученицы Александре, Павле и Николае, / веры Православныя исповедницы явистесья. / Темже о нас Владыку всех молите, / грехов разрешение нам даровати.

Слава, и ныне, Богородичен:

Не имамы инаго прибежища разве Тебе, Богородице, / отечества нашего усердная Заступнице: / всяк бо, почитаяй Тя, надежду обретает.

Песнь 4

Ирмос: Вознесена Тя видевши Церковь на Кресте, / Солнце Праведное, / ста в чине своем, / достойно взывающи: / слава силе Твоей, Господи.

Новомученницы Александре, Павле и Николае досточуднии, / вы, яко Иосиф древле, от лжебратий на муки предани бысте / и, яко агнцы незлобивии, посреде волков явилисья есте.

Крепостию веры вашае диавола посрамили есте, тричисленнии мученицы

Христови/ и, светом Трисолнечным
просвещаеми,/ тьму безбожия разгнали есте.

Истиннаго Бога служителие истиннии
показалися есте, прехвальнии мученицы,/ лжи
миродержителя не покорившеся и отеческих
преданий не отступивше,/ веры Православныя
твердии поборницы явилися есте.

Богородичен: **Е**же паче смысла и разума
Бога плотию родила еси, Пречистая Дево,/ Того
моли спастися душам нашим.

Песнь 5

Ирмос: *Ты, Господи мой,/ Свет в мир пришел
еси,/ Свет Святый, обращаи из мрачна
неведения/ верою воспевающи Тя.*

Христе, Свете истинный,/ к свету
невечернему путенаставил еси мученики Твоя./
Тех молитвами помилуй и спаси нас.

Упование ваше на Христа единого
возложивше, святии мученицы,/ и, подвигом
добрым подвизавшеся,/ венцы победныя
терпением стяжали есте.

Человеков слава и ангелов удивление явились есте, святии мученицы, / гонения и поношения, узы и раны, страдания и смерть претерпевше, / мзду достойную трудов своих прияли есте.

Богородичен: Едину чистую и нетленную Деву Матерь / воистину быти исповедуем Тя, Владычице Премилостивая, / моли Рождшагося от Тебе спастися нам.

Песнь 6

Ирмос: *Возопи, прообразуя погребение тридневное, / пророк Иона в ките моляся: / от тли избави мя, Иисусе, Царю сил.*

Не от чрева китова, якоже древле Иона, / но из темниц и мрачных узилиц возописте Христу, святии страдальцы, / и, силою Того укрепляеми, / от тьмы смертныя к свету невечернему востекосте.

Мрака безбожия непричастни, / к свету Трисиянному прешли есте, богомудрии трие мученицы, / страданий не убоявшеся и непреклонни во истине пребывше.

Приимите песни и похвалы наша, пастырю добрый Александре / и верная мучеников

двоице Павле и Николае,/ веры Православныя
поборницы и ревнителие,/ от Царя Славы
славою небесною увенчанныи.

Богородичен: Иже покровом Твоим осеняеми,
Пресвятая Дево,/ в храме Твоем вопием Ти:/
молитвами Твоими спаси нас.

Кондак, глас 4:

Святых мучеников честную память днесь
совершающе,/ прославляем Христа, сих
прославльшаго,/ и с любовью зовем к ним:/
священномучениче Александре преблаженне,/
мученицы Николае и Павле досточуднии, /
Владыку всех непрестанно молите/ даровати
нам мир и велию милость.

Икос:

Красуйся и ликуй Церковь Русская,/ яко
благоплодная лоза страдальцев новых
израстившая,/ добropобедным мучением сердца
верных укрепивших,/ заповеди Господни
исполнивших и присно евангельски учивших:/
не убойтесь от убивающих тело, души же не
могущих убить,/ убойтесь же паче Могущаго
душу и тело погубить в геенне./ Темже,
священномучениче Александре и мученицы

Павле и Николае,/ молити Христа Бога спастися душам нашим.

Песнь 7

Ирмос: Авраамстии иногда в Вавилоне отроцы/ пещный пламень попраша, песньми зывающе:/ отец наших, Боже, благословен еси.

Миродержца и князя тьмы века сего не убоявшеся, святии мученицы,/ служителей его нечестивых посрамили есте, верою зывающе:/ благословен Бог отец наших.

Огня геенскаго неопальни явистеся, святии мученицы тричисленнии,/ якоже древле трие отроцы в печи халдейстей,/ ко Христу верою зывающе:/ благословен Бог отец наших.

Сетей велиаровых ловления избегше/ и соблазны века сего скоротечнаго отвергше, доброхвальнии страдальцы,/ мученическими венцы увенчались есте, поюще:/ благословен Бог отец наших.

Богородичен: Иже любовью Христовою уязвляеми, мученицы,/ Тебе добрую в женах

боголепно почитают и, радуящиеся, воспевают:/
благословенна Ты, Всенепорочная Владычице.

Песнь 8

*Ирмос: Руце распротер Даниил,/ львов
зияния в рове затче;/ огненную же силу
угасиша,/ добродетелию препоясавшися,/
благочестия рачители, отроцы, взывающе:/
благословите, вся дела Господня, Господа.*

Христа единого возлюбивше/ и Тому
страданьми вашими сораспеншися, мученицы
достославнии,/ сподобистесь живот премирный
наследовати и воспевати:/ благословите, вся
дела Господня, Господа,/ пойте и превозносите
Его во веки.

Неотреченны пребывше имене Христова,/
клеветы, гонения и узы претерпели есте,
страстотерпцы,/ ныне же с лики небесными
купно воспеваете:/ благословите, вся дела
Господня, Господа,/ пойте и превозносите Его
во веки.

Блажени есте, святии мученицы
достославнии,/ пресвитере Александре и Павле
с Николаем,/ изряднейшии о вере ревнителие,/

вы бо, мучители безбожнѣя посрамивше, / вся
вернѣя воспевати научили есте: / благословите,
вся дела Господня, Господа, / пойте и
превозносите Его во веки.

Богородичен: О, Владычице Богородице,
Пречистая Одигитрие! / Ты мученики славныя к
Небесным наставила еси, / и нам, грешным,
стею спасения укажи, / Тебе бо, Чистая,
присно благословим / и превозносим во вся
веки.

Песнь 9

Ирмос: Камень нерукосечный / от
несекомыя горы, Тебе, Дево, / краеугольный
отсечеса, / Христос, совокупивый разстоящаяся
естества. / Тем, веселящеса, Тя, Богородице,
величаем.

Священников лица славословят вас,
мученицы Христови непобедимии, / и людие
православнии почитают подвиги ваша
боголепно, / ибо кровью и страданьми вашими
вера истинная утверждается.

Новыя исповедники веры Православныя яви
вас Господь, / да вашими молитвами мы, чада

ваша, во благочестии и любви поживше, /
сонаследницы Царствия Христова явимся.

О, преславнии мученицы христоименитии, /
пресвитере Александре и Николае с Павлом
досточуднии, / сродницы наши и
наставницы, / о нас непрестанно Христа
молите спастися душам нашим.

Богородичен: Спасения Ходатаица нам
явилася еси, Пренепорочная Владычице, /
икону Твою даровавши в знамение приснаго
Твоего к нам благоволения и помощи. / Темже
не престай Сына Твоего и Бога нашего молити /
спастися душам нашим.

Светилен, глас 5:

Троицы Святыя поборницы непобедимии
явистесь, / тричисленнии мученицы, / света
Трисолнечнаго зарями просвещаемы, / светом
веры истинныя просветите нас.

Слава, и ныне, Богородичен:

Сладость ангелов, / мучеников Утверждение, /
христианом Предстательнице и Помощнице, /
Мати Дево, заступи нас и мук вечных избави.

На хвалитех стихиры, глас 5.

Подобен: Радуйся:

Днесь светло красуется земля Русская, / от пленения духовнаго избавльшаяся / страданьми святых своих новых мученик, / иже гонения от безбожных претерпеша / и истину Христову исповеданием своим явиша. / Тех молитвами, Христе Боже, / мир миру Твоему даруй / и душам нашим велию милость.

Днесь боголепно ликует Церковь Русская, / совершаючи память святых своих мученик, / Александра, пастыря изряднейшаго, / и Павла с Николаем, ревнителем благочестия, / тии бо кровьми своими землю нашу оросиша / и страданьми своими ангелы и человеки удивиша. / Тех молитвами, Христе Боже, / мир миру Твоему даруй / и душам нашим велию милость.

Днесь радуется земля Московская, / яко плод добрый Христу приносящи, / новомучеников троицу достохвальную, / торжествует же и православных множество, / страстотерпцев молитвами просвещаемо и

укрепляемо./ Тех молитвами, Христе Боже,/ мир миру Твоему даруй/ и душам нашим велию милость.

Слава, глас 8:

Ангелом крепостию подобницы бывше, святии мученицы,/ пред гонители безбожными Христа мужески проповедасте/ и, вся, яже в мире сем, оставивше,/ телеса на раны предасте,/ веру же и надежду твердо удержавше,/ рая божественное наслаждение улучисте./ Вонже внити и нас сподобите молитвами вашими.

И ныне, Богородичен, глас тойже:

Владычице, прими молитвы раб Твоих/ и избави нас/ от всякия нужды и печали.

Славословие великое. И отпуст.

На литургии

Блаженны от канона, песни 3-я и 6-я. Прокимен, глас 4: Святым, иже суть на земли его,/ удиви Господь вся хотения Своя в них.

Стих: Предзрех Господа предо мною выну,/ яко одесную мене есть, да не подвижуся.

Апостол к Римляном, зачало 99, или ко Евреем, зачало 330. Аллилуия,

глас 4: Воззваша праведнии и Господь услыша их,/ и от всех скорбей их избави их.

Стих: Многи скорби праведным и от всех их избавит я Господь.

Евангелие от Луки, зачало 106. Причастен:
Радуйтесь, праведнии, о Господе, правым подобает похвала.